

DOMINGU XX TEMPU KOMÚN – TINAN A

Tema

Liturjia Domingu XX Tempu Komún nian refleto kona-ba universalidade salvasaun nian. Maromak hadomi nia oan ida-idak no ba sira hotu Nia konvida ba han-hemu Reinu nian.

Iha *leitura dahuluk*, Jahwéh garante ba nia Povu tempu foun ne'ebé atu mai, iha ne'ebé sei revela Maromak nia salvasaun. Maibé, salvasaun ne'e la'ós de'it ba Israel: nia ba mane no fetu hotu ne'ebé aseita konvite atu integra an iha comunidade Maromak nia Povu nian.

Evanjellu apresenta realizasaun profesia Trito-Isaías nian, ne'ebé ita haree iha leitura dahuluk domingu ne'e nian. Jezús, haree tiha katak farizeu no doutór sira Lei nian lakohi Ninia proposta Reinu nian, nia tama iha rejiaun jentiu sira nian no hatudu oinsá ema jentiu sira merese simu Maromak nia don. Ba fetu kananeia ida ne'ebé fiar, Jezús oferese salvasaun ne'ebé Maromak promete atu fó ba ema hotu laho distinsaun.

Leitura daruak sujere katak Maromak nia laran-sadia suli ba nia oan sira hotu, suli mós ba sira ne'ebé, hanesan Israel, rejenta Ninia proposta sira. Maromak respeita nafatin ema nia opsaun sira; maibé la deziste atu propoin, iha momentu hotu no ba nia oan sira hotu, oportunidade foun atu simu salvasaun ne'ebé Nia hakarak oferese.

LEITURA I – Is 56,1.6-7

Leitura dahuluk domingu ne'e nian halo parte bloku ida testu sira-nian hanaran “Trito-Isaías” (kf. Is 56-66). Ba balun, nia mak testu profeta anónimo ida, pós-ezília nian, ne'ebé hala'o ninia ministériu iha Jerusalém, entre ema sira ne'ebé fila husi Babilónia, iha tinan 537-520 mK; ba maioria, testu sira-ne'e mai husi autór barak, no hakerek durante tempu naruk ida (provavelmente entre sék. VI no V mK). Tempu ne'e mak tempu pós-ezília nian.

La'ós época fasil ida. Ema sira fila husi ezília sente lakon korajen, basá knaar rekonstrusaun nian kleur no difisil. Buat hotu rahun, sidade sira rahun no ema la hela, to'os husik mamuk de'it no la kuda. Ema riku sira lalais de'it hahú hanehan ema kiak no ema ki'ik sira. Husi pontudevista relijiozu, ambiente karakteriza ho inkomprensaun kona-ba Maromak nia planu sira, ho setisizmu no deskonfiansa, ho kultu husi li'ur de'it no hodi filafali ba prátika idolatria nian. Iha faze ne'e, amlulik Josué no governadór Zorobabel iha papél fundamentál, responsavel ba servisu sira rekonstrusaun Templu nian.

Oinsá mak ema sira fila husi ezília ba Jerusalém, iha faze ne'e, relaciona ho povu seluk? Ita la iha resposta loloos, tanba ita la koñese di'ak período istória Maromak nia Povu nian ida-ne'e. Testu ruma época ne'e nian hatudu abertura ida ba universalidade, hodi sujere katak ezília, hodi loke kontaktu ho realidade kulturál no relijioza seluk, lori Maromak nia Povu ba toleránsia ba nasaun seluk... Testu seluk época nian hatudu taka-an ne'ebé maka'as liután (aleinde esperiéncia dramátika ezília nian, opozisaun povu viziñu sira-nian iha altura ne'ebé ema sira fila husi ezília buka harii hikak Jerusalém aumenta deskonfiansa ho ema estranjeiru sira), ne'ebé nia tutun mak polítika xenófoba Esdras no Neemias nian, iha metade daruak sékulu V mK (anula no bandu kazamentu mistu entre judeu no estranjeiru sira – kf. Esd 9,1-10,44; Nee 13,23-31).

Provavelmente testu ne'ebé propoin mai ita mosu iha tinan sanulu depoizde ezília, bainhira comunidade diskute se eunuku no ema estranjeiru sira bele eh lebele integra iha comunidade Maromak nia Povu nian (kf. Is 56,3).

MENSAJEN

Ba komunidadé ne'ebé lakon esperansa no korajen, profeta haklaken katak besik daudaun tempu foun ida. Buat ne'ebé karakteriza tempu foun ne'e mak prezensa salvasaun no justisa iha komunidadé Maromak nia Povu nian.

Komunidadé presiza, prepara an atu simu Maromak nia don hodi pratika justisa (“mishpat” no “zedaqa” – desizaun loos iha tribunál, ne'ebé sai fundamentu ba orden sosiál loos).

Buat foun liu ne'ebé iha mak Maromak nia salvasaun la'ós de'it ba Israel, maibé mós ba ema estranjeiru sira. Ne'e mak revolusaun boot iha universu relijiozu Maromak nia Povu nian.

Ba autór sira livru Deuteronomio nian, tenke harahun ema estranjeiru sira; Israel la bele halo paktu naran ida ho sira, la bele aseita mós aliansa kazamentu ho sira. Altár povu estranjeiru sira-nia tenke harahun hotu, sira nia ai-riin lulik tenke tesi kotu hotu, hamonu sira-nia monumentu hotu, sunu sira-nia lulik iha ahi. Se Israel la halo nune'e no tolera ema estranjeiru sira, Jahwéh nia hirus sei bá hasoru Povu no sei hamohu nia (kf. Dt 7,2-5).

Oras-ne'e, Maromak rasik mak hakarak oferese ninia salvasaun ba povu hotu, inkluzive ema estranjeiru sira. Saida mak ema estranjeiru sira presiza halo atu sira tama iha komunidadé Maromak nia Povu nian? Buat rua: “kumpre sábadu, hodi la hafoer nia” no sai “fiél ba Aliansa”. Halo nune'e sira sei iha direitu tomak iha komunidadé Maromak nia Povu nian. Sira sei partisipa iha liturjia Maromak nia Povu nian no Jahwéh rasik sei lori sira ba Templu, iha-ne'ebé sira bele oferese karan no sakrifísiu hanesan israelita sira. Templu sei la sai ona uma ne'ebé taka no Israel de'it mak iha asesu, maibé sei sai “uma orasaun nian ba povu hotu” (perspetiva ne'e konserteza hetan difikuldade boot atu metin iha Israel, iha époka Testamentu Foun rasik, estranjeiru sira ne'ebé vizita Jerusalém la bele liu husi esplanada esteríór Templu nian – “átriu jentiu sira-nian” – liután la bele tama iha “átriu israelita sira-nian”).

LEITURA II – Rom 11,13-15.29-32

Ita kontinua reflète kestaun ne'ebé halo terus Paulo: Israel maski nia mako Povu ne'ebé Maromak hili lakohi salvasaun ne'ebé Kristu oferese. Sira sei la hetan salvasaun?

Iha introdusaun ba kestaun ne'e (kf. Rom 9,1-5), Paulo admite katak nia aseita atu haketak an husi Krsitu, se ida-ne'e serve atu judeu sira aseita salvasaun ne'ebé Maromak la deziste atu oferese.

Maski Paulo triste la dehan katak odamatan hotu taka ona. Maromak la rejeita ninia Povu, tanba, uluknanai parte ida (parte ki'ik ida, “restu” ida) Israel nian adere ba Jezús (kf. Rom 11,1-6) no tama iha komunidadé Reinu nian (Paulo rasik halo parte ba grupu ne'e); daruak, tanba kona-ba Israel nia fuan toos hasoru proposta Maromak nian, hakerek nanis ona iha Eskritura, no konterteza tama iha Maromak nia plalnu sira (kf. Rom 11,7-10).

Israel nia rekuza, ikusmai halo atu propoin Evanjellu ba jentiu sira (kf. Rom 11,11-12). Maromak hakerek loos iha liña kleuk sira...

MENSAJEN

Paulo kontinua ninia ministériu iha jentiu sira leet, ho esperansa atu israelita sira sente laran-moras no simu Maromak nia don sira (vers. 13-14).

Paulo konvensidu katak, lonon ida, Israel tomak sei hetan salvasaun. No ida-ne'e akontese la'ós de'it tanba haktuir iha Eskritura (kf. Rom 11,26-27), maibé liuliu tanba Maromak nafatin fiél ba Ninia promesa sira.

Jentiu sira, husi sira-nia parte, lalika sente superíór ba israelita sira. Maromak mak bolu Israel husi kedas inísiu no Maromak nia bolun la troka (vers. 29). Jentiu sira, ne'ebé uluk dook husi

Maromak, agora iha asesu ba Ninia grasa; judeu sira, ne'ebé agora hadook an husi Maromak nia don sira, sei hetan mós grasa. Buat hotu tama iha Maromak nia projetu salvasaun nian ne'ebé halo atu ema hotu sai rebelde, atu Ninia laran-sadia suli ba ema hotu. No Israel, povu eleitu, ne'ebé horiuluk kedas Maromak bolu, konserteza nia sai objetu spesiál Maromak nia laran-sadia nian.

EVANJELLU – Mt 15,21-28

Ita kontinua iha sesaun “instrusaun kona-ba Reinu” (kf. Mt 13,1-17,27). Apresenta tiha pregasaun kona-ba Reinu liuhusi aikanoik (kf. Mt 13,1-52), Mateus haktuir Jezús nia interlokutór sira nia resposta ba proposta ne'ebé tranzmite ba sira (kf. Mt 14,1-17,27).

Mateus hatudu katak comunidade judaika lakohi simu Jezús nia proposta, hanesan ema Nazaré nian (kf. Mt 13,53-58), Erodes (kf. Mt 14,1-12), eskriba, farizeu no saduseu sira (kf. Mt 15,1-9; 16,1-4.5-12).

Molok epizódiu ne'ebé propoin mai ita, mosu konfrontu ida entre Jezús no farizeu no doutór sira Lei nian, tanba tradisaun judaika sira (kf. Mt 15,1-9). Ho konfliktu ne'e, Jezús “hadook An husi ne'ebá no bá iha Tiro no Sídon”. Ho Israel nia rekuza atu simu Reinu halo atu Jezús dirije nia pregasaun hakat liu fronteira sira Israel nian. Komunitade dixípulu sira-nian – grupu ne'ebé rona ho atensaun Jezús nia proposta Reinu nian no simu – akompaña Jezús.

Epizódiu haktuir iha Evanjellu domingu ne'e nian, situa ita iha “rejiaun Tiro no Sídon nian”. Iha Jezús nia oin iha fetu “kananeia” ida. Naran “kananeia”, iha Testamentu Tuan, atu dehan fetu pagán (iha ne'e, fetu ida husi Fenícia).

Fenícia, ba judeu sira mak rai inimigu. Husi ne'ebá mak liu ezérsitu inimigu nian; husi ne'ebá mai influénsia relijioza aat, ne'ebé hadook israelita sira husi fiar iha Jahwéh no lori sira atu halai tuir lulik sira kananeu sira nian. Jezabel, liurai Acab nia feen, ne'ebé habiit kultu ba Baal no Asserá (iha sék. IX mK nia klaran, iha profeta Elias nia tempu) no husik hela memória aat ba Jahwéh nia adeptu sira mak liurai Sídon nia oan-fetu ida. Tanba ne'e mak ita la hakfodak katak, farizeu no doutór sira Lei nian, ne'ebé defende pureza fiar nian, konsidera makhorik sira zona ne'e nian nu'udar “asu sira” (liafuan ne'ebé ba judeu sira iha sentidu pejorativu aas liu).

Fetu Fenícia nian, husu atu nia mós iha asesu ba salvasaun ne'ebé Jezús lori mai. Jezús sei oferese salvasaun ba fetu jentia ne'e? Feto Fenísia ida (estranjeira, inimiga, husi rejiaun ho fama aat, no liután “fetu” ida) merese grasa salvasaun nian?

MENSAJEN

Uluknanai, ita konsidera, figura fetu Fenícia nian... Ninia intervensaun tolu hatudu, husi sorin ida, ninia ánsia salvasaun nian; no, husi sorin seluk, ninia fiar metin no ho konviksaun (bolu “David nia oan” – ne'ebé hanesan ho “Mesias” – no “Na'i” – “Kyrios” – hodi dirije ba Jezús, mak konfisaun fiar nian ida). Nia mak figura ida ne'ebé impressiona ita ho ninia fiar, ho ninia haraik an no mós ho ninia terus ne'ebé bele haree husi ninia apelu.

Hafoin, ita hakfodak, ho oinsá Jezús trata fetu ne'ebé husu tulun ne'e. Nia hahú hodi la fó atensaun, aparentemente la liga ba fetu ninia apelu sira (vers. 23). Hafoin, ho dixípulu sira nia insisténsia, Nia hatán: “Ha'u mai de'it ba bibi sira ne'ebé lakon husi uma-kain Israel nian” (vers. 24). Finalmente, ho pedidu dramátiku ikus fetu ne'e nian (“Na'i, tulun ha'u”), Nia hatán: “Hola oan sira nia aihan hodi soe ba asu-oan sira la'ós justu” (vers. 26).

Oinsá komprende Jezús ne'ebé sempre preokupa atu hatudu jestu konkretu domin no laran-sadia Maromak nian ba ema sira, ho ninia atitude toos no insensivel ne'e? Jezús nia reasaun mai husi konviksaun katak tuir Maromak nia planu salvasaun tenke ba uluk judeu sira, molok

fó ba jentiu sira?

Jezús nia atitude iha sentidu, se ita haree nu'udar estratéjia pedagójika ida, destina atu hatudu oinsá prekonseitu judaiku hasoru jentiu sira, diskriminasaun sira ne'ebé katekeze ofisiál judaika propoin la iha baze. Hodi halo nia atitude sai toos liu ba beibeik hasoru “kananeia” nia apelu, Jezús fó ba feto possibilidade atu hatudu ninia firmeza no konviksaun fiar nian no prova ba judeu sira katak ema jentiu sira merese – karik merese liufali membru “santu” sira Maromak nia Povu nian – atu tuur iha meza Reinu nian. Feto ne'e, iha ninia haraik an, la husu atu tanesan nia an ho Povu eleitu, ne'ebé simu konvite atu tuur iha festa han-hemu Reinu nian... Nia disposta atu hetan de'it paun “rahan” ne'ebé monu husi meza (vers. 27); maibé nia husu ho insisténsia atu husik nia iha asesu ba salvasaun ne'ebé Jezús lori mai. Kontráriu ho farizeu no doutór sira Lei nian, taka an iha sira-nia autosufisiénsia no sira-nia prekonseitu, rejeita kontinualmente salvasaun ne'ebé Jezús la para atu oferese ba sira.

Hatudu tiha pagaun sira nia laran-diak no meresimentu, Jezús dehan: “Feto, ó-nia fiar boot tebes! Halo duni tuir ó hakaran”. Jezús nia afirmasaun signifika: “loos duni katak ó disposta atu simu Ha'u nu'udar Ida ne'ebé Aman haruka no aseita paun Reinu nian, paun ne'ebé Maromak fó atu halakon nia oan sira nia hamlaha ba moris. Simu bá salvasaun ne'ebé haraik ba ema hotu ne'ebé iha fuan nakloke ba Maromak nia don sira”.

Iha finál sékulu dahuluk, judeu-sarani balun sei iha difikuldade atu simu jentiu sira iha Jezús nia Kreda. Mateus fó hanoin ba sira katak, ba Jezús buat ne'ebé importante eh desizivu la'ós rasa, istória, eleisaun, maibé adezaun firme no ho konviksaun ba proposta salvasaun Maromak halo ba ema sira liuhusi Nia. Jezús nia comunidade mak comunidade universál. Buat ne'ebé desizivu ba asesu salvasaun nian mak fiar, katak, kapasidade atu adere ba Jezús no Ninia proposta moris nian.